

Udako Euskal Unibertsitateak
25 urte

AURTENGO IRUÑEKO ETA BAIONAKO UDA IKASTAROEK HAUTAZKO KREDITU GISA BALIOKO DUTE EHU-N ETA NUP-EN

Ekitaldi handi batekin ospatuko dira zilarrezko ezteiak Donibane-Lohizunen

UEUren zilarrezko ezteiak ospatzeko antolatu den ekitaldi handia eta aurten egingo diren uda ikastaroak aurkeztu zituzten atzo Iruñean UEUko arduradunek. Udako Euskal Unibertsitatearen 25 urteak udan beteko dira berez, baina urteurrena etzi larunbatez ospatuko da Donibane-Lohizunen.

Luis Fernandez / Iruñea

Udako Euskal Unibertsitateak zilarrezko ezteiak ospatuko ditu etzi larunbatez Donibane-Lohizunen, Maurice Ravel auditoriumean, goizeko 11:00etatik aurrera. Ekitaldira UEUtik pasatutako ikasle eta irakasle guztiak daude gonbidatuta. Berez, 25. urteurrena abuztuan beteko da, uda sasoi horretan egin baitzen Donibane-Lohizunen bertan UEUko lehen jardunaldia. Maurice Ravel lizeoan orduko hartan.

Ekitaldi hori eta aurtengo uda ikastaroak Iruñean aurkeztu zituzten atzo. Urteurrena dela eta, aurkezpen berezia egin nahi izan zuen UEUk, eta Nafarroako Diputazioaren Jauregia aukeratu zuten horretarako. Han izan ziren Mikel Aizpuru UEUko zuzendaria, Edurne Alegria Baionako jardunaldietako arduraduna, Mari Karmen Meñika idazkari nagusia, eta Fernando Perez de Viñaspre Nafarroako Hizkuntza Politikarako zuzendari nagusia.

Aitzindariari gorazarrea • Duela 25 urteko jardunaldi haien bultzatzaile nagusiei omenaldia egingo zaie Donibane-Lohizuneko ekitaldian. Lau izen nabarmendu zituzten atzoko agerraldian: Karlos Santamaria, Manex



Mari Karmen Meñika, Perez de Viñaspre, Mikel Aizpuru eta Edurne Alegria atzoko aurkezpenean.

JOXE LACALLE

Goienetxe, Piarres Xarriton eta Jean Haritzelhar. «Hauek egingo dako lanak eta ahaleginak eskertu nahian, eta beraiek ereindako haziak eman duen, ematen ari den eta emango duen uztaren isla izan nahi du ospakizun honen», azaldu zuen atzo Iruñean Edurne Alegriak.

Eskertza publikoa egingo zaie, bestalde, duela 25 urte irakasle izan zirenei. Honako hauei, hain zuzen ere: Luis Villasante, Jose Luis Alvarez Enparantza Txillardegi, Xan Irigarai, Jose Ramon Etxebarria, Jose Luis Lizundia, Joseba Intxausti, Anjel Lertxundi, Ibon Sarasola, Gixan Bidart,

Jose Mari Satrustegi, Joxe Mari Larramendi, Juan San Martin, Patxi Altuna, Joxe Azurmendi, Roman Garate, Jean Louis Davant eta Paulo Agirrebaltzategi. Oroitzapen berezia izango dute hil egin diren orduko irakasleek: Joxe Migel Barandiaran, Klaudio Harluxet, Koldo Mitxelena, Alfonso Irigoien, Telesforo Monzon eta Piarres Narbaiza. Izan zerrendari erreparatzea nahikoa da konturatzeko euskal kulturgingintzak garrantzi handia eman ziola UEUren proiektuari berau jaio zenean.

Erakundeetako ordezkariak ere izango dira etziko ekitaldian. Mari Karmen Garmendia EAEko Kultura sailburua eta Fernando Perez de Viñasprek berak konfirmatu dute beren presentzia, besteak beste. Ekitaldi hori ez da urteurrena ospatzeko egingo den bakarria. UEUren «istorioak eta historia» biltzen dituen erakusketak bat prest dago: Donibane-Lohizunen erakutsiko da lehen aldiz, eta ondoren herriz herri ibiliko da. Bideo bat eta liburu bat ere abian dira. «25 urte betetzea askori huskeria irudituko

zaio, mendeetako tradizioa duten unibertsitateen ondoan, baina guretzat gertakari garrantzitsua da», esan zuen Edurne Alegriak.

«Euskara eta unibertsitatea lotzea» • UEUko zuzendariak, Mikel Aizpuru, ez zuen zilarrezko ezteiez asko hitz egin, eta aurtengo jardunaldien nondik norakoak azaldu zituen ordea. Hala ere, aipatu zuen duela 25 urte markatutako ildoak bere hartan segitzen dutela UEUn. «Euskara eta unibertsitatearen mundua lotzea» da UEUren helburu nagusia. Bestetik, Aizpuren esanetan, «UEUk ez du errepikatu nahi unibertsitateetako eskoletan ematen dena. Gauza berriagoetara jo nahi du, eta euskal kulturaren kezkei eta euskalgintzaren premiei erantzutera».

Euskal Unibertsitatea —euskarak funtzionatuko duena— sortzeko lan egiten duen UEUren 25 urteko norabidea azaldu zuten atzo laburki UEUren ordezkariak. Francoren garaian oraindik, Baionan 1970etik egiten zen Euskal Kultur Astearren jarraipen gisa jaio zen UEU 1973an. Handik bi urtera, bere egitasmoa eta filosofia finkatu zituen Uztaritzen deklarazio batean. 1977an, Hegoaldeko giro berriaz baliatuz, Iruñera pasatu ziren jardunaldiak. Iparraldeak apur bat zokoratua geratu zen ondorioz, baina 1984tik aurrera berriaz udako jardunaldiak antolatzen hasi ziren Baionan. Iaz, Baionakoan ere ostatu hartzeko aukera izan zuten irakasleek, eta horrek izena ematen dutenen kopurua handitu du. Izan ere, Hegoaldetik etorritakoak Iparraldekoak baino gehiago izan ziren iazko Baionako ekitaldian.

Nolanahi ere, UEUren jardunaldi nagusiak Iruñekoak dira orain ere. Larraona ikastetxean izan ohi dira, eta laguntza berezia dute Nafarroako Gobernuarena. «Iruñeko jardunaldien garrantzi eta ospeaz jabeturik laguntzen dio Gobernuak UEUri», adierazi zuen atzo Fernando Perez de Viñasprek. X

Berrogei ikastaro Baiona eta Iruñean

IAZ SINATUTAKO akordioen ondorioz, UEUko uztaileko jardunaldietako ikastaroek hautaketa libreko kreditu gisa balio izango dute Hegoaldeko unibertsitate publikoetan, EHU eta NUPen. Deustuko Unibertsitatearekin ere harremanetan dira antzeko hitzarmen bat lortzeko.

40 ikastaro desberdin izango dira aurtengo jardunaldietan. 11 Baionan, uztailaren 7tik 12ra, eta 29 Iruñean, uztailaren 14tik 26ra. Baionako ekitaldiari dagokionez, iaz bezala aurten ere Rene Cassin lizeoko ikastaroetara joateko Baionan bertan ostatu hartzeko aukera izango da. Horrek Hegoaldeko irakasleak erakarriko ditu eta izaera

osoa emango die berriro ekitaldiei. Izan ere, Iparraldeko gaiei lotutako ikastaroak egongo dira (kazetaritzakoa) kasu, baina beste batzuk generikoak dira. Esate baterako, UEUko Literatura sailak *Literatur zaletasunaren didaktika* izeneko ikastaroa antolatu du Baionarako, eta beste bat Iruñerako. Sail batzuek, bestetik, Baionan bakarrik izango dute ikastaroa (sexologiakoa, adibidez).

Nolanahi ere, ohitura den bezala, Iruñeko jardunaldiak izango dira UEUko ardatza. Aurten Sanferminen garra itzali gabe hasiko dira, uztailaren 14an. «Pentsatzen dugu jendeak formal erantzungo duela», esan zuen Mikel Aizpuru atzo. Bestetik, egonal-

dietarako eta ekitaldi osagarri eta protokolozkoetarako Larraona ikastetxea erabiliko da beti bezala, baina eskolak beste toki batean emango dira, ikasgelak obretan izango direlako Larraonan. Ordezko tokia Iturrama institutua izango da, Larraonatik 10 bat minutura oinez.

Ikastaroei dagokionez, ohiko sailek antolatu dituzte. Ikastaro berri bat badago aurten, sugestopedia, eta iaz azaldu ez ziren sail batzuk itzuli dira: artea, kimika eta literatura. Diziplinen arteko ikastaro mistoak ere izango dira aurten. Filosofia eta Psikologia sailen artean *Zientzia eta teknologia* ikastaroa antolatu dute, eta Soziologia eta Ekonomia elkartu dira neoliberalis-

moa tratatzeko beste ikastaro batean.

UEUk informatikarekin eta teknologia berriekin duen lotura azpimarratu zuen, hala ere, Mikel Aizpuru. Hortaz, iaz izandako web orriak egiteko ikastaroa errepikatuko da aurten (hasberrientzakoa da bereziki). Arte ikastaroen teknologia berrien erabilerrari arreta berezia eskainiko diote.

Matrikula epea ekainaren 2an irekiko da, hiriburuetako ohiko tokietan. Aurten, gainera, Interneten UEUk duen webgunean ere egin ahal izango da izen-ematea formulario bat beteta. Gune horretan ikastaroetako informazio osoa egongo da publikoaren esku ekainaren 2tik aurrera.

ELKARTASUN BRIGADAK

• CUBA • MEXICO
• NICARAGUA • GUATEMALA



KOMITE
INTERNAZIONALISTAK

Tel.: BILBO: 94/4790703
PASAIA: 943/340404
GASTEIZ: 945/281193
IRUÑEA: 948/211173